

L'amur per muntognas ed aissas

Ina aissa, quatter rodas, in frain ed alléhop da la spunda giu

DA CLAUDIA CADRUVI / ANR

■ **Snowboard, dirtboard, mountainboard, skateboard, kiteboard.** Sch'ins n'enconuscha betg la scena, vegn ins balurd da tadlar, co ils dus amis tschantschan. Markus Zahner e Daniel Zigerlig aman aissas e cutgnas. Els aman cunzunt las muntognas. In enviern senza culms e naiv fiss per els ina pura catastrofa. Ir davent? Forsa la stad in zichel. Il pli tard cura che las emprimas scrotas crodan, èn els puspè en Svizra.

Aissa cun frain

Ma uss datti il mountainboard. Lez renta Markus e Daniel perfin la stad a las Alps. «Avant in onn hai jau casualmain chattà en ina stizun a Son Gagl questa aissa», raquinta Markus. «Jau hai immediat cumprà ella ed empruvà or.» Ins ha il medem sentiment (tun original: fee-

ling) sco cun il snowboard. «I n'è betg difficil dad ir», sincerescha il profi.

L'aissa da Markus Zahner è circa sco in skateboard. Las rodas èn dentant pli grondas e betg da gumma cumpact, ma bain sco quellas d'in velo. Quai è pli lom dad ir sin pastgiras. Las plimas tranter rodas ed aissa sminueschan era las pitgadas.

Malgrà zambagls tras il terren malgulliv poi tuttina capitar ch'ins survegn in tempo narr. Perquai ha il mountainboard insatge che autras aissas da sport n'han betg. Numnadain frains. Il cabel da frain va da las rodas davos si tras l'aissa. El ha ina lunghezza d'in meter. A la fin dal cabel hai crutschs da franar sco ils crutschs tar il velo.

Privels glischnus

Èsi in sport privlus? «Gnanca zic», dian Markus e Daniel. Main privlus che ir cun snowboard? I cumenza in disput.

«Ir cun cutgna è pli privlus», di Markus. Daniel protesta: «Na!»

Markus: «Ma cler. Sch'i ha glatsch sin la pista èsi diraglia, sche ti cupitgas.»

Daniel: «I ha darar glatsch. Il bler roclas en la naiv loma.»

Markus: «Il pastg è era lom.»

Daniel: «E la crappa en la pastgira? Lezza vesas adina memia tard. Lura na vegnas betg d'untgir e fas la chambrocla.»

Markus: «Ma betg uschè brutalas chambroclas sco quella che Ti has fatg l'enviern passà cun la cutgna.»

Daniel: «Tgenina?»

Markus: «Cura che ti es schulà quatter meters da la rusna giuaden.»

Daniel: «Lezza giada avevi brentina.»

En quai stil va il discours vinavant. Domadus èn para già turnads a chasa cun bravas bottas e sgrognas. «Ma privlus n'èsi atgnamain betg.»

Markus e Daniel van mai senza protecturs cun aissa. Ils protecturs pulstreschan il bist, las spatlas ed il dies. Enturn la schanuglia ed ils cumbels mettan els schanegiaders.

A propos. Daniel ha da preschent accident. Il schanugl. El è sa glischnà. Uschè tup. En bognera.

Sulet per ils incharnads

Markus è suenter in onn già expert da mountainboard. Daniel ha pir questa

stad survegni la fevra. Els abiteschan en il chantun Glaruna e Son Gagl ed emprovan en quellas regiuns da chattar lieus cun bunas pendenzas. Mintgatant van els era sin vias cun mountainboard. Il meglier sajan las vias cun scumond da charrar. «Bel èsi dad ir sin vias da glera. Sin lezzas han ins in bun 'freeride feeling' ed i saja in zichel 'sliding'.»

Sche Markus è en viadi cun ses board, vegn el savens plidentà. Tut vul savair co l'aissa funcziuna. «L'acceptanza è fitg buna», di Markus. La gliעד na sa grittenteschia betg pli sco l'entschatta sur dals

snowboardists. «Entras il success da Gian Simmen è quest gener da sport uss er acceptà.»

E tge prognosas fan ils dus amis? Datti en diesch onns ina massada giuventetgna che schula cun il mountainboard da las spundas giuadora? «Snowboard è daventà in megatrend. Ma quest sport qua na vegn mai uschè grond», manegian Markus e Daniel. Il mountainboard resta insatge per ils fans ils pli incharnads dal snowboard. Quels che dovan era la stad il feeling dad undegiar da spundas taissas giu.

Dapli infos sut: www.shaka.ch



L'aissa da Daniel Zigerlig (sanester) è fatga sco in snowboard. Quella da Markus Zahner è da lain sco in skateboard.



In sigl bunamain sco cun il snowboard.